

theil in allem geschwind fürkommen/ sich zu Fuß begeben/ vnd mit an den Sturm gehen/ auch wider das Fußvolck mitstreiten/ die Lager von Hinten versichern / vnd die Lanckgräben vor des Feindes Außfall vertheidigen/ Für allen Dingen aber/ wie sie in Scharmützel/ bevor ab/ in Haupttreffen/ dem Theil/ welcher sich ihrer wol vnd zu rechter Zeit zugebrauchen weis / endlich den Sieg in die Hand geben kan/ Solches bedarff gantz keiner Außführung/ alle Historien vnd Bescheide/ seynd hiervon voll/ vnd hat man nun eine Zeit hero solches auch gnugsam gesehen vnd erfahren.

Ob nun wol in vnterschiedenen Sprachen etliche gefunden werden/ welche von der Fürtrefflichkeit der Reusterey/ vnd was derselben in Kriegszügen allenthalben obliegt/ vnd gebühret/ auch etwas in Schrifften verfasst vnd an Tag gegeben/ So ist doch/ meines wissens/ keiner/ welcher dem Ritter Ludovico Melzo fürzuziehen sey/ als der selbst dem Kriegswesen eine lange Zeit beygewohnet/ Besonders aber in den Niderlanden/ allda er Hispanischer Königlichcr Kriegsrath vnd General Lieutenant vber die Cavalleria gewesen/ dann er mit solchen Fleiß vnd Umbstenden derselben ganzes Thun vnd Wesen in Feldzügen/ in solche richtige præcepta vnd Reguln verfasst / vnd mit denckwürdigen Exempeln erkläret/ daß billich alle Ritterleut ihn wert halten/ bleissig lesen/ vnd ihnen wol einbilden sollen/ daher Ich auch so viel mehr bewogen worden/ der löblichen Deutschen Ritterschafft zum besten/ welcher Lob/ Ehr/ dignitet vnd höchste Zier einig vnd allein auffm Kriegswesen zu Roß/ bestehet/ Ihn aus der Italienischen Sprach in vnser Deutsche zuübersetzen/ damit also denen/ welche der Welschen Sprach nicht kundig/
dig/